

Nefndarsvið Alþingis  
Efnahags- og viðskiptanefnd  
Austurstræti 8-10  
150 Reykjavík

Reykjavík 15. desember 2016

**Efni: Umsögn Brúar lífeyrissjóðs um frumvarp til laga um breytingar á lögum um Lífeyrissjóð starfsmanna ríkisins nr. 1/1997, með síðari breytingum (breyting á A-deild sjóðsins), 6. mál.**

Með tölvupósti frá nefndarsviði Alþingis þann 14. desember 2016 var Brú lífeyrissjóði sent til umsagnar 6. mál, frumvarp til laga um breytingar á lögum um Lífeyrissjóð starfsmanna ríkisins.

Frumvarpið, eins og nafn þess gefur til kynna, fjallar að meginefni um breytingar á lögum sem ekki varða Brú lífeyrissjóð, þrátt fyrir að þær breytingar sem um ræðir og frumvarpið fjallar um, taki einnig til Brúar lífeyrissjóðs, þ.e. sú breyting að lífeyrisréttindi verði jöfnuð milli almenna og opinbera vinnumarkaðarins þannig að reglur um ávinnslu réttinda og lífeyristökualdur opinberra starfsmanna taki breytingum, enda fellur Brú lífeyrissjóður undir þá flokkun að vera lífeyrissjóður opinberra starfsmanna.

Í 8. gr. frumvarpsins er fjallað um breytingar á öðrum lögum. Eftirfarandi athugasemdir eru gerðar við 8. gr. frumvarpsins:

**Hvað varðar undanþágu frá ákvæðum um samsetning eigna:**

*a liður: „Við ákvæði til bráðabirgða III í lögumum [lögum um skyldutryggingu lífeyrisréttinda og starfsemi lífeyrissjóða nr. 129/1997] bætist við ný málsgrein svohljóðandi: Skuldabréf sem A deild tekur við sem greiðslu samkvæmt ákvæðum til bráðabirgða IX, X og XIII í lögum um Lífeyrissjóð starfsmanna ríkisins eru undanþegin takmörkunum 2. mgr. 36. gr.“*

Sveitarfélögin munu bera kostnað vegna A deildar Brúar náí breyting þessi á lífeyriskrefi opinberra starfsmanna fram að ganga gagnvart Brú lífeyrissjóði. Fram kemur í athugasemdum við frumvarpið að sveitarfélög munu á sama hátt og ríkið leggja til framlag í lífeyrisaukasjóð til Brúar lífeyrissjóðs.

Brú lífeyrissjóður telur vegna þessa nauðsynlegt að ákvæði um undanþágu um samsetningu eigna, þ.e. ný málsgrein við bráðabirgðaákvæði III, taki einnig til Brúar lífeyrissjóðs.

**Hvað varðar frestun ákvörðunar um hækkun iðgjalda lífeyrissjóða á opinberum vinnumarkaði:**

*b liður: „Við lögina bætist nýtt ákvæði til bráðabirgða, svohljóðandi: Þrátt fyrir ákvæði 39. gr. skal iðgjald launagreiðenda til lífeyrissjóða á opinberum vinnumarkaði vera það sama árið 2017 og það var árið 2016.“*

Brú lífeyrissjóður telur rétt að vekja athygli á að iðgjald A deildar Brúar lífeyrissjóðs á árinu 2016 er 16% (4% iðgjald launamanns og 12% mótframlag atvinnurekanda) og verði iðgjaldið áfram það sama stangast það á við iðgjald það sem ákveðið hefur verið í kjarasamningi aðildarféлага Alþýðusambands Íslands og Samtaka atvinnulífsins frá 21. janúar 2016 þar sem gert er ráð fyrir 4% iðgjaldi launamanns og 11,5% mótframlagi atvinnurekanda.

Umræddur kjarasamningur nær ekki til launagreiðenda og sjóðfélaga í A deild Brúar lífeyrissjóðs og telur lífeyrissjóðurinn því nauðsynlegt að kveðið sé skýrar á um það hvert iðgjald í A deild Brúar lífeyrissjóðs skal vera til framtíðar litið m.a. með hliðsjón af því að markmið frumvarpsins er að lífeyrisréttindi verði jöfnuð milli almenna og opinbera vinnumarkaðarins.

**Hvað varðar lagaskyldu til breytinga á samþykktum Brúar lífeyrissjóðs:**

Í 8. gr. frumvarpsins er ekki kveðið á um breytingu á lögum um skyldutryggingu lífeyrisréttinda og starfsemi lífeyrissjóða nr. 129/1997 á þá leið að A deild Brúar lífeyrissjóðs verði umbreytt í sama horf og á við um lífeyrissjóði fyrir almenna vinnumarkaðinn með sama lífeyristökualdri, aldurstengdri réttindaávinnslu og almenna vinnumarkaðnum. Í athugasemdum með frumvarpinu kemur þó fram í kaflanum um *Úrlausn lífeyrisskuldbindinga vegna A deildar LSR* að „gert sé ráð fyrir að sambærilegar ráðstafanir verði gerðar vegna A-deildar lífeyrissjóðsins Brúar á vegum sveitarfélaga“ og má því lesa úr athugasemdum með frumvarpinu að vilji löggjafans standi til þess að umbreytingin eigi einnig að taka til A deildar Brúar lífeyrissjóðs.

Efnahags- og viðskiptanefnd er hér með upplýst um ákvæði 42. gr. samþykpta Brúar lífeyrissjóðs sem er svohljóðandi:

42.1. Samþykktum þessum verður ekki breytt nema með samþykki stjórna stofnaðila sjóðsins, þ.e. BSRB, Bandalags háskólamanna, KÍ og Sambands Íslenskra sveitarfélaga.

42.2. Stjórn lífeyrissjóðsins er heimilt að gera breytingar á samþykktum sjóðsins án þess að kynna þær á ársfundi, sbr. grein 4.2. [sem fjallar um dagskrá aðalfundar sjóðsins] ef slíkar breytingar leiða beint af ófrávíkjanlegum ákvæðum laga eða reglugerða.

Fyrir hönd Brúar lífeyrissjóðs

  
Gerður Guðjónsdóttir, framkvæmdastjóri

  
Þóra Jónsdóttir, sviðstjóri réttinda- og lögfræðisviðs